

Basler Fastnacht 1921



Alti Klatsch - Clique

(Schnitzelbank)

4-stimmig

1. Fascht schneller als im Flugziig
Sin mir do ane ko.
Me kenn Hie Schnitzler bruuche
Hän mir mit Fraid vernoh.
Und anstatt z'Nacht go z'traume
Do hän mir dichtend g'wacht.
Und au no g'moolt dernäbe;
Jetz still! kai Lärme g'macht.
2. Reich mir die Hand, mein Leben!
So het d'r Konsum denkt;
Däm Baselbieter Grämpler
Si Bruederhand er lengt:
Wenn zämme mir dien wurschte
So rette mir d'Fabrik
d'r Kundschaft Sand in d'Auge —
Verduble d'r Profit.
3. Vom wirglic scheene Mole
Do seht me nimme viel.
Wenn aine rächt will schlierge,
So isch's modärne Stil.
Johannes und au Säufer
Hän mir jo z'Basel gnue
Dä Brunneschäreschliffer
Dä passt famos derzue.
4. Bim Abbruch vom Klaibasel
Nüt wertvolls wird entdeckt.
E Regiment vo Wanze
Isch nur d'rbi verreckt;
Doch d'Schwobekäfer leidet
Die sin z'vertriebe nit,
Will's in de neue Hüser
Scho wieder jungi git.
5. Jetz schmeggt me scho d'r Pfeffer
Im Ragout „Völkerbund“.
Hät d'Schwiz nur keine g'frässe —
Dert dra verreckt e Hund.
Drum kame bald begriffe
D'r Name „Schwizerkueh“.
Gib numme d'Milch no abe,
Doch sunscht mach d'Auge zue.
6. Die Staatsbiamtefraue
Fascht hän biko e Schlag.
Bis Er bekunnt si Zapfe
Do goht's no vierzäh Tag.
Und Gläubiger die sammle
Sich vor d'r Türe-a.
D'r Schuldner ka nit zahle,
Het au nit z'gnage ka.
7. Die Ballnacht do in Basel
Die wärde stark akut.
E Mängge suecht dert Kalbfleisch
In zarter Backfischhutt;
Denn d'Sittligkeit zieht nimme
In seriöser Kluff —
An jedem Huus und Egge
Do schmeggt me d'Bordelluff.
8. Jetz fahrt die Schwizerflotte
Gwiis in d'r Untersee.
Versenkt sin die Millione —
Das tuet im Bund nit weh.
Doch reut en jede Batze
Wenn's Volk isch in d'r Not.
Dä „maritimi“ Blödsinn
Färbt mänggem Kuttle rot.
9. Ihr scheene Schwizerfraue
Wie het Euchs Kino g'flohnt.
D'r Teifel ka nit sage
Wo soone Perle wohnt.
Die mues als Scheensti gelte
Wo s'Mul nit viel benutzt
Und ihri Pfanne suber
Zur Fraid vom Alte putzt.